

## Tony Snell: Tir ha Taves

*Y'n skol mayth esov owth oberi ynni, Lywydh an Asrann a Yethow Arnowydh a wovynnas orthiv yn 2001 skrif a bardhonek yn Kernewek hag adro dhe'n yeth Kernewek. Hemm o rag diskwedhiyans a vardhonogow, skrifys gans dyskadoryon ha dyskyblon keffrys, yn lies yeth.*

*Otomma ow assay dhe dhiskwedhes nebes a sonyow, a nerth, a spyrys, hag a gnas a'n yeth Kernewek: brewys kyns yn browsyon sygh, mes hedhyw owth egina a-nowydh yr ha teg.*

Awel wyls a helgh kommol,  
hwibana dre Ven-an-Toll,  
deghesi dornas grow sygh  
a-dhiwar leur an grommlegh,  
herdhya tonnow goedh a garth  
trethow enyal a-gledhbartz.

Klopenn drogh, challa, kildhyns:  
darnow a dhaffar-kows kyns.  
Gans tavas, gelvow hebleth,  
anall dhovhes - otta yeth!

Kri gwylanas a dhassen  
orth klegar an dinas hen.  
A-ugh an ledrow gwydhyel  
skrij bargos a helgh y'n hayl.  
Y'n woen, kan an ahwesyd  
ow liva dres ebrenn rydh.

Geryow roghys, diwreydhys  
mes a weres glyb a hwys.  
Lavarow an lywyader

dh'y veni krev, levys ter.  
Pysadow an pergherin  
hwistrys a-rag kreryow krin.

Eskern koth krev re besyas,  
keherow re devis bras  
ow tifres gwythi medhel  
yn gwias gwayadow kel.

Y'n nans benen ha'y baban  
a wrowedh yn gwels war'n lann.  
Dowr skav y'n gover ha son  
a'y lapy a dann an leghyon  
kepar ha kows heudh hegar:  
tri lev ow kessen i hwar.

Degynsow hi re dhyskas  
nebes geryow y'n yeth mas:  
'Ow hwegoll' ha 'kuv kolonn'.  
Resyas hebask hen ha ton.

Dythow digeudh, kosel, kuv,  
maga bludh avel mannbluv,  
a woer pesya dres pub oes  
pub ravnans, koll, ha terroes.